

## DEVOZIUNS POR LE TËMP DE CARSËMA

### DAURIDA

I aldiun le profet: *Tl dër tëmp t'ejaudësci; canch'al gnará le de dla salvëza, vëgni a te daidé.*

**Sëgn él gnü le dër tëmp;**  
**sëgn él chiló le de dla salvëza.**

I ves periu al post de Crist: *Lascésse reconzilié cun Chël Bel Dî! Chël che ne conesciô nia le picé, l'á porté por nos, por ch'al nes gniss scinché te ël la misericordia de Dî.*

**Sëgn él gnü le dër tëmp;**  
**sëgn él chiló le de dla salvëza.**

*Descëdete, no sté a dormí y lea sö dai morc, y Crist sará tüa löm.*

**Sëgn él gnü le dër tëmp;**  
**sëgn él chiló le de dla salvëza.**

Vigni ann danü él la Dlijia che nes inviëia tl tëmp de Carsëma da s'arjigné y zelebré la mort y la ressoreziun dl Signur. Ara chërda dantadöt ala converjiun y al renovamënt de nosta vita cristiana cun la Parora de Dî. I sun inviá te chësc tëmp da fá oraziun y opres de ciarité, da jí a ciafé i sacramënc che renovëia te nosta vita la grazia. Insciö nes condüj Chël Bel Dî cun la penitëenza y cun opres de bunté ala ligrëza de Pasca.

Periun!

**Tüa grazia nes vëgnes adincuntra y nes accompagnëies,  
por che döt ci ch'i fajun pëies ia da te y vëgnes perfezioné da te. Amen.**

### INVIT ALA CONVERJIUN (PRÖMA DOMËNIA DE CARSËMA)

Insciö dij le profet Ezechiel (18,31-32):

*Lascede dïc i malfac da na pert, cun chi ch'i ves ëis incolpé! Arjignésse n cœur nü y n spirit nü.  
Ciodí orëise pa morí? Iö n'a pa impó degun plajëi cun la mort dla jënt - parora de Dî, le Signur.  
Dede ota, por ch'i viëise.*

Ascutede la usc dl Signur, no ti stlujede le cœur.

**Ascutede la usc dl Signur, no ti stlujede le cœur.**

Insciö dij l'apostul Paul tla lëtra ai Efejins (18,31-32):

*Despiesse le chestian vedl y renovede osc spirit y üsc sentimënc!*

*Vistisse le chestian nü, che é cherié do la somëia de Dî, por ch'i viëise veramënter tla iustizia y tla santité.*

Ascutede la usc dl Signur, no ti stlujede le cœur.

**Ascutede la usc dl Signur, no ti stlujede le cœur.**

Insciö dij Gejú (*Merch 1,15*):

*Le tëmp é complí, y le règn de Dî é daimpró. Convertisse y cherdedi al vangele!*

Ascutede la usc dl Signur, no ti stlujede le cœur.

**Ascutede la usc dl Signur, no ti stlujede le cœur.**

*c h ï t*

I jun por n gröm de trus che vá damat. Le Signur nes chërda söl tru che condüj ala vita. I aldiun n gröm de parores che nes ingiana y nes mënt dant.

**Le Signur nes dij la parora dla verité, la parora fora dla bocia de Dî, de chëra ch'i podun vire.**

I odun tröc lomins che nes adorbëia y nes mëna tla tentaziun. Le Signur nes chërda ch'i ti junse do a d'él.

**Ël é la löm. Chël che ti vá do ará la löm dla vita.**

Periun!

**Signur Gejú Crist t'as dit: Iö sun le tru, la verité y la vita; chël che vëgn do a me ne romagn nia tla securité. Dëidesse ch'i se convertiunse a te y ch'i gnuñse creatòres nöies. Deache tö es nosc Signur y maester, te laldunse por dagnora. Amen.**

## LE COMBATIMËNT CUNTRA LE MAL (SECUNDA DOMËNIA DE CARSËMA)

Chi che é batia s'un á desdit dl mal y ne vir nia plü sot ala potënsa dl picé. Porchël ne pó le mal, che sozed, nia nes ester anfat. Tl combatimënt danter le bëgn y le mal, che vëgn combatü te düt i témpls, te düt i raiuns, te dötes les comunitàs y te vigni cör, messunse se mëte dala pert dl bëgn.

- Ne stede a rete le mal cun le mal, mo ciarede da ti fá dl bëgn a düt.

### I orun adoré Idî, le Signur, y sorví ël su.

Tla confermaziun sunse gnüs renforzá cun la forza de Dî. Le Spirit nes dëida da se mëte cuntra le mal.

- No te lascé devënje dal mal, mo devënje le mal cun le bëgn.

### I orun adoré Idî, le Signur, y sorví ël su.

L'eucaristia nes unësc a Gejú Crist y danter nos. Chësta comuniun renovëia te nos les forzes dl bëgn.

- Ciarede ch'i ne ciafëise nia debann la scincunda de Dî.

### I orun adoré Idî, le Signur, y sorví ël su.

La confesciun nes scinca le pordon de Dî. I podun indô mëte man danü.

- Al é gnü l'ora da se descedé dala sonn. Deache sëgn é la salvëza plü daimpró co canch'i ên gnüs credënc.

### I orun adoré Idî, le Signur, y sorví ël su.

c h î t

L'apostul Paul nes inviëia tla lëtra ai Efejins (6,14-18) da adoré les scincundes de Dî tl combatimënt cuntra le mal:

*Stede frëms tla fede y ciolésse incëria la verité; tolede por armadöra la iustizia y vistisse por cialzá la prontëza da combate por le vangele dla pesc! Dantadöt brancede do le scü dla fede! Cun chël sëise bugn da destodé dötes les saïtes dl füch dl mal. Tolede l'elm dla salvëza y la sabla dl Spirit, che é la parora de Dî. No lascede do da perié. Periede demeztrú tl Spirit. Stede muntri, ede dorada y periede por düt i sanc (cristians).*

I periu do la scincunda da ester bugn da desfarenzié y da conësce le bëgn

### Signur, mënesse le Spirit dla conescëenza

I periu do la forza da ti tigní bot al mal.

### Signur, mënesse le Spirit dla forza.

I periu ch'i sunse bugn da fá lominé le bëgn tl monn.

### Signur, mënesse le Spirit dla santité.

## RENOVAMËNT DL BATO (TERZA DOMËNIA)

Dal liber dl profet Ezéchiel (47,8-9):

*L'agno dl Signur m'â condüt dan l'entrada dl tëmpl. I odô l'ega sbrocan fora dala pert de misdé. Al m'â dit: Chësta ega rogor tl raiun oriental y vá jó tl'Áraba y fluësc tl mer, tl mer dal'ega sarada. Insciö vëgn l'ega sarada sana.*

*Olache le rü röia, dailó podará vire dötes les creatöres viëntes, döt ci che büsia, y al sará n gröm de pësc. Deache chësta ega röia dailó, él dötes les ones che devënta sanes; tan inant che le rü arjunj, dailó romagn döt en vita.*

**I t'aprijun, oh Dî, Pere onipotënt, deache t'as cherié l'ega, ch'ara purifichëies y días vita.**

**Tl bato éra n sëgn ch'i gnuñ purificá da vigni colpa.**

I aldiun inant le profet Ezéchiel (47,12):

*Da trames les peris crëscel de vigni sort de lëgns da ordöra, süa fëia ne vëgn nia flacia y ai ne sará mai zënya früç. Vigni mëis porti früç frësc, deache l'ega vëgn dal santuar.*

**I t'aprijun, oh Dî, Pere onipotënt, deache te nes as fat nasce tl'ega dl bato a vita nöia.**

**Tla forza de to Spirit podunse porté früt por to règn.**

Gejú dij:

*Chël che bër de chëst'ega, ciasfará indô sëi; mo chël, che boiará de chë ega che iö ti dará, n'ará mai plü sëi; deplü, l'ega che iö ti dará deventará te èl na fontana d'ega che sprinza por la vita eterna. (Jan 4,14)*

**I t'aprijun, oh Dî, Pere onipotënt, deache te nes lasces bëre fora dles fontanes dla salvëza y destödes nosta sëi do vita.**

Dal liber dl profet Ezéchiel (36,24-26.28):

*La Parora de Dî m'é gnüda dita a me:*

*I ves toli fora di popui y ves abini adöm da dlunch adalerch.*

*I jutará ega näta sön os, y i gnareis néc.*

*I ves scinchi n cör nü y mëti te os n spirit nü.*

*Os sareis mi popul y iö sará osc Dî.*

**I te laldun, oh Dî, Pere onipotënt, deache, abiná adöm te to Fi Gejú Crist,  
fejeste fora de nos to popul.**

**Fora de so piet davert él rogorü sanch y ega sciöche sägn,  
che da süa mort y da süa ressoreziun nascel la Dlijia.**

**I sun batiá te un n Spirit ch'i formunse un n corp.**

*c h i t*

I te periu, renovëia te nos la ligrëza, ch'i sun batiá tl inom de Gejú, to Fi.

**Renovëia te nos la fede, ch'i sun deventá, tres le bato, porsones näies.**

Renovëia te nos la speranza che la salvëza, che nes é gnüda scincada te Gejú Crist, se completará.

**Renovëia te nos l'amur, che nes é gnü juté te nüsc cörs tres le Spirit Sant.**

Deache tres le bato sunse gnüs sopolis cun Crist te süa mort, por ch'i podunse vire sciöche él,  
che é gnü ressuscité dai morc, tla realté de süa vita näia.

**I te laldun por döta l'eternité. Amen.**

#### LIGRËZA POR LA DLIJIA (CUARTA DOMËNIA)

Ralegrésse, i sun le popul de Dî, chirí fora por süa grazia.

**Ralegrésse, i sun le popul de Dî, chirí fora por süa grazia.**

Ralegréite, Ierusalem, abinésse düt adöm, os ch'i ti orëis bun a Ierusalem. Os ch'i eis albü da sofrí,  
sëise ligri de cör. Esultede, boiede y pascentesse pro la fontana dla consolaziun, che vá por os porsura.

**Ralegrésse, i sun le popul de Dî, chirí fora por süa grazia.**

Letur: Dala Revelaziun de San Jan (21,9-11,14.23-24):

*N agno m'á dit: Ví, i ó te mostré la nücia, la éra dl Agnel.*

*Spo m'ál trasporté tl'estasa sön na gran munt alta y m'á mostré la cité santa de Ierusalem,  
sciöche ara gnô da Idî jö dal cil, implida dla gloria de Dî.*

*Ara slominâ sciöche na pera preziosa y na pera de iasper cristalin.*

*Le mür dla cité à dodesc peres de fondamënta: lassura él i dodesc inoms di dodesc apostui dl Agnel.*

*N tëmpl n'odôi nia tla cité.*

*Deache le Signur, so Dî, le regnant sura döta la creaziun, é so tëmpl, él y l'Agnel.*

*La cité n'adora no sorëdl, no la löna che ti lomina.*

*Deache la gloria de Dî la ilominëia, y süa löm é l'Agnel.*

*Y i popul variará te süa löm.*

*c h i t*

Dal salm 87:

*Le Signur ti ô bun a süa cité; ara é fondada sön munts santes.*

*De gran vëgnel cunté de te, tö cité de nosc Dî.*

**Vigni raiun y vigni cité \***

**ói cumpedé lapró pro chi che te onorëia.**

*I popul indlunch söla tera, \**

*é düt nasciüs da te.*

**Y de Zion cuntarán: "Vignun é nasciü dailó,**

**"l'Altiscim instës ti á metü la fondamënta."**

*Le Signur scriará tl liber di popul:*

*"Düt é nasciüs dailó."*

**Y dal bal da festa ciantarán:**

**"Da te náscl dötes les fontanes."**

Signur Gejú Crist, tüa Dlijia é cherdada da ester n popul nü,  
che é sön tru adincuntra ala Ierusalem dl cil.

**Láscesse crëie tl dagní dla Dlijia; láscesse conësce le travert de so tru.**

Tüa Dlijia é cherdada da ester la Ierusalem näia danter i popui.

**Láscesse ester unis, por che le monn crëies.**

Tüa Dlijia é cherdada da mostré sön te y da arjigné ca to avënt danter dük i popui.

**Dëida tüa noela da ne s'archité ignó sólo tera.**

Tüa Dlijia é fata sö sólo fondamënta di apostui.

**Dëidesse mantigní la fede y la renové tres indô danü.**

Te i os bun a tüa Dlijia, cina a so completamënt.

**Dëidesse da ester nunziadus de to amur.**

I cherdun tla Dlijia, öna, santa, catolica y apostolica.

**I aspetun la ressoreziun di more y la vita eterna.**

#### LE SORVISC AL PROSCIM (CUINTA DOMËNIA)

Letur: Dal liber dl profet Isaia (58,6-7)

*Chësc é n jaiun sciöche iö l'ó:*

*ti deslié les morones ai inozënc, rumpí vigni ju, ti dé to pan ai arfamá, té sö i püri che n'á nia n'abitaziun;  
sce te vëighes n desnü, le vistí y ne tralascé nia to fre.*

Deache i ê arfamé, y os m'ëis dé de mangé;

**i à sëi, y i m'ëis dé da bëre;**

i ê zënza tët, y i m'ëis tut sö;

**i è desnü, y i m'ëis vistí;**

i ê amaré, y i sëis gnüs a me ciafé;

**i è te porjun, y i sëis gnüs da me.**

Chësc é n jaiun sciöche Idî l'ó.

**Ci ch'i ëis fat al mënder de mi fredesc, chël ëise fat a me.**

Letur: Dala lëtra de San Iaco (2,14a.15-17)

*Fredesc y sorus, ci jol pa, sce un dij de avëi fede, mo sc'al mancia les opres?*

*Sce n fre o na so é zënza guant y zënza le pan da vigni de,  
y un de os ti dij a d'ëi: Jide en pesc, scialdésse y pascentésse,  
mo ne ti dá nia ci che so corp adora – ci ti jô pa chël?*

*Insciö é ince la fede por se instëssa morta, sc'ara ne vëgn nia accompagnada dales opres.*

Deache i ê arfamé, y os m'ëis dé da mangé;

**i à sëi, y i m'ëis dé da bëre;**

i ê zënza tët, y i m'ëis tut sö;

**i è desnü, y i m'ëis vistí;**

i ê amaré, y i sëis gnüs a me ciafé;

**i è te porjun, y i sëis gnüs da me.**

Letur: Dal liber dl profet Isaia (58,10-12)

*Dái al arfamé to pan y pascentëia chël che á debojëgn!*

*Spo vá sö na löm tl sciür.*

*Te pës n urt bagné, na fontana che ne s'assüia nia sö.*

*tö fejes indô sö les ruines vedles, les fondamëntes mëteste indô apost.*

Sc'i n'oju nia nosta odlada demez dai püri,

**spo ne ojaraste gnanca tö, oh Dî, tüa odlada demez da nos.**

c h î t

I accompagnun les ofertes ch'i dun cun nostes suplices por la jënt che vir tla puerté y tl arbandonn.  
I periu por i popui tl Orient, tl'America Latina, tl'Africa, tl'Asia y tl'Ozeania:

**Signur, delibrëii dala fan, dales maraties, dales iniustizies y dales veres.**

Por i governanc y i ric ti stac dl terzo monn:

**Fá ch'ai vëighes ite ci ch'ai dess fá por le bëgn dla jënt.**

Por i païsc che vir tla richëza:

**fá ch'ai sais da daidé tla dërta manira y ch'ai dëides pordemënter.**

Por i païsc tl svilup:

**Signur, fá fora de d'ëi nunziadus dla pesc y incundadus dla buna noela.**

Por nos instësc:

**Láscesse porté pro cun nostes ofertes ala pesc y ala salvëza dl monn.**

**Pere tl cil, benedësc l'umanité che tö as cherié.**

**Condüjela ala salvëza por Crist, nosc Signur. Amen.**

### CRUSC Y PASCIUN (DOMËNIA DAL ORÍ)

Letur: Dal vagnele do San Matî (21,1-11)

*Canche Gejú é rové cun süù accompagnadus nia dalunc da Ierusalem, a Bétfaghe söla Munt dl Ori,  
ál ortié dui discepui danfora y ti á dit:*

*Jide tl païsc che é dan os; dailó ciasfarëise na müscia tacada y n polorin lapró.*

*Destachédela, y condejédemla! Y sce zacai ess da ves dí val', spo respognede:*

*Le Signur l'adora, al la lascia defata condijje derevers.*

*Chësc é sozedüi por ch'al s'adempliss ci che é gnuì dit tres le profet:*

*Dijedi ala fia de Sion: Ciara, to re vëgn da te.*

*Al ó la pesc, y al raita sön na müscia y n polorin, sól polorin de n tier da port.*

*I discepui é jüs y á fat ci che le Signur ti á dé sò.*

*Ai á condüt la müscia y le polorin, á metü süù guanc sön chisc y spo s'ál senté lassura.*

*Tröpa jënt destenô süù guanc ia por strada, d'atri taiâ jö rames dai lëgns y les sternô ia por tru.*

*La jënt, che jô danfora y che ti gnô do, scraiâ:*

*Osanna al Fi de Davide! Benedi sides ël, che vëgn tl inom dl Signur. Osanna tl plü alt dl cil!*

*Canch'al é jü ite te Ierusalem, s'â döta la cité emozioné y an damanâ:*

*Che é pa chësc? La jënt dijô: Chësc é le profet, Gejú da Nazaret tla Galilea.*

c h i t

Dal Salm 100:

*Cighede dan dal Signur; os düc païsc dla tera!*

*Sorvide le Signur cun ligrëza!*

**Gnide dan da so müs cun iubilanza!**

**Reconescede: Le Signur su é Dî!**

*Ël nes á cherié, nos sun so avëi,*

*so popul y le pastorëc de süa pastöra.*

**Rengrazian jide da sües portes ite!**

**Cun cianties de lalt gnide tles curts de so tëmpl!**

*Rengraziédele, so inom aprijede,*

*deache la bunté dl Signur é grana!*

**Por dagnora döra süa tlemënza**

**y süa fedelté da na generaziun al'atra.**

*Al Pere y al Fi y al Spirit Sant*

*sides lalt y gloria,*

**sciöch'al é sté, sciöch'al é y sará**

**por döta l'eternité. Amen.**

Canche Gejú jô ite tla cité de Ierusalem êl tröpa jënt che ti iubilâ adincuntra.

**Ince nos orun te laldé y te glorifiché.**

Gejú Crist, tö es gnü sólo tera a daidé la jënt.

**I te laldun y te glorificun!**

Tö nes as mostré l'amur de Dî, Pere: Te i jôs pormez ai püri, ai pici y ai mituns.

**I te laldun y te glorificun!**

Tö pordones i picia: Piciadus aste invié pro tüa mësa.

**I te laldun y te glorificun!**

Tö renforzes nosta fidënsa te Dî, nosc Pere: Tö as n cör plëgn de bunté.

**I te laldun y te glorificun!**

Tö vëgnes cun nos por le tru de nosta vita: Tö nes conësces y te sas ci ch'i adorun:

**I te laldun y te glorificun!**

Tö es cun nos ince tl'ora de nosta mort.

**I te laldun y te glorificun!**

Gejú Crist, laota êste jü ite tla cité de Ierusalem

Incö vëgneste ite te nüsc cörs.

**Porchël orunse te tlamé "Benedí tl inom dl Signur!"**

Tö che t'os davagné la jënt por l'amur.

**Benedí este tö che te vëgnes tl inom dl Signur.**

Tö che t'os condüje la jënt ala compasciun.

**Benedí este tö che te vëgnes tl inom dl Signur.**

Tö che t'os consolé y varí i amará.

**Benedí este tö che te vëgnes tl inom dl Signur.**

Tö che ti os alisiré le pëis ai oprescioná.

**Benedí este tö che te vëgnes tl inom dl Signur.**

Tö nes lasces sinti tüa vijinanza tles porsones dlungia nos.

**Benedí este tö che te vëgnes tl inom dl Signur.**

Tö nes lasces ciafó to aiüt da porsones che nes dëida.

**Benedí este tö che te vëgnes tl inom dl Signur.**

Tö nes das la ligrëza ch'i ne sun nia susc.

**Benedí este tö che te vëgnes tl inom dl Signur.**

*c h ï t*

Gejú Crist, deache tö i os bun ala jënt, podunse te perié:

Dái a nosta manira da vire val' de to sfandur y de tüa scempelté. - Crist, ascútesse - **Crist, ejaudëscesse.**

Tólesse cun te són to tru che passa por la porta tla vita. - Crist, ascútesse - **Crist, ejaudëscesse.**

Tóletun sura de dük i tralasciá tles veres y ti combatimënc de chësc monn. - Crist, ascútesse - **Crist, ...**

Varësc y renforza i cörs de chi che plöra por porsones ch'ai á dër mancia. - Crist, ascútesse - **Crist, ...**

Descëda te nos les cianties de chi che confida en te y stravérdesse dal baudié. - Crist, ascútesse - **Crist, ...**

Scínchesse la forza de tüa misericordia. - Crist, ascútesse - **Crist, ...**

Dëidesse da ti sté do a ci che ti fej bun a d'atri. - Crist, ascútesse - **Crist, ...**

Láscesse odëi tan che la fortüna di atri é buna da nes acontenté nos instësc. - Crist, ascútesse - **Crist, ...**

### ***Benedisciun:***

Bel Dî, benedëscesse, stravérdesse dal mal, varëscesse y mantëgnesse te tüa grazia.

Benedëscesse, y delibrëiesse da ci che nes despartësc da te.

Benedëscesse, scínchesse la comuniu cun te che é por nos la dërta vita.

Tl inom dl Pere y dl Fi y dl Spirit Sant. **Amen.**